

Memorandum o saradnji u Građansko pravnoj oblasti zaključen između

Općinskog suda u Tuzli

i

Kantonalnog suda u Tuzli

Osnovni postulati uspješnog pravosuđa su zakonitost, pravna sigurnost i efikasnost, a ujedno i nezavisnosti svakog od sudova u okvirima njihove nadležnosti, kao i sudija pojedinačno, pa su se u cilju postizanja tih načela potpisnice Memoranduma sporazumjele o njegovom sadržaju kako slijedi :

I - Ovaj Memorandum se zaključuje u cilju :

- podizanja stepena pravne sigurnosti i povjerenja građana u pravosuđe,
- unapređenja efikasnijeg i ekonomičnijeg ostvarivanja prava stranaka pred prvostepenim i drugostepenim sudom, koje će za posljedicu imati i smanjenje broja predmeta,
- poboljšanja kvaliteta rada sudija,
- jačanja autoriteta suda i procesne discipline,
- jačanja i unapređenja rada sudskih odjeljenja i predsjednika odjeljenja.

II - Ugovorne strane su se saglasile da se njihova saradnja odvija :

- održavanjem sastanaka između predsjednika oba suda i predsjednika odjeljenja iz oba suda, a po potrebi i predsjednika drugostepenih vijeća, i najmanje dva puta godišnje, a tema kojih sastanaka će biti primjena novih propisa, pojavljivanje novih vrsta predmeta, pojavljivanje većeg broja istovrsnih predmeta, razmatranje aktuelnih pravnih stavova i način njihove primjene na konkretne predmete, upoznavanju s dostupnim stavovima drugih sudova, razmjena zapažanja u radu oba suda, i druga pitanja koja budu delegirana, a o ishodu kojih sastanaka će biti upoznate i sudije oba odjeljenja,

- međusobno ukazivanje predsjednika odjeljenja na različito postupanje i odlučivanje u istovrsnim ili sličnim predmetima, kako bi se na

odjeljenjima zauzeo jedinstveni stav, a o kojem će predsjednik tog odjeljenja obavijestiti predsjednika odjeljenja drugog suda, koji će o tome upoznati sudije svog odjeljenja,

- delegiranje tzv. „pilot“ predmeta drugostepenom sudu od strane prvostepenog suda u slučajevima kada postoji više tužbi sa istovrsnim ili sličnim tužbenim zahtjevima ili kada se opravdano može očekivati da će veći broj takvih tužbi biti podneseno, a radi ujednačavanja postupanja i postizanja veće pravne sigurnosti, u kom slučaju će predsjednik odjeljena prvostepenog sud dostaviti predsjedniku drugostepenog suda i predsjedniku odjeljenja drugostepenog suda obrazložen zahtjev za prioritarno rješavanje delegiranog predmeta, te ako isti bude opravdan drugostepeni sud će taj delegirani predmet riješiti u razumnom roku, ne dužem od 90 dana,

- organizovanje ciljnih edukacija ili okruglih stolova, po potrebi u saradnji i sa Centrom za edukaciju sudija i tužilaca Federacije Bosne i Hercegovine, te Pravnim fakultetima, u cilju angažovanja edukatora i profesora za odabrane teme, a na kojima će učestvovati sudije i stručni saradnici oba suda,

- razmjena novih pravnih stavova zauzetih na odjeljenjima oba suda i razmjena informacija za koje se procjeni da su bitne za postupanje u predmetima,

- na drugi pogodan način.

III - Radi ostvarenja navedenih ciljeva potpisnice Memoranduma će nastojati da kroz rad svojih odjeljenja afirmišu načela efikasnosti i ekonomičnosti postupka, kao i aktivniju ulogu sudija u tim odjeljenjima, kako bi se otklonili nedostaci koji usporavaju postupak pred prvostepenim i drugostepenim sudom, a tiču se pitanja urednosti dostave pismena strankama, urednosti zastupanja, donošenja odluka o svim zahtjevima stranaka, urednosti žalbe i sl.

IV - Radi izgradnje i poštivanja autoriteta suda potpisnici Memoranduma će unaprijediti organizaciju rada u sudovima, te će kontinuirano raditi na promovisanju procesne discipline i poboljšanju kvaliteta sudskih odluka, te postizanju povjerenja građana u rad pravosuđa.

V - Potpisnice Memoranduma su saglasne da se uspostavljena saradnja treba i dalje razvijati i unapređivati, te se obavezuju na kontinuirano djelovanje u tom pravcu.

VI - Ovaj Memorandum stupa na snagu danom potpisivanja od strane ovlaštenih lica Potpisnica Memoranduma, a zaključuje se na neodređeno

vrijeme. Memorandum je zaključen u 4 (četiri) istovjetna primjerka, po 2 (dva) za svaku Potpisnicu.

OPĆINSKI SUD U TUZLI

Broj: 002m-07-19-000 348

Tuzla, 03. juni 2019. godine



Muhamed Tulumović,
predsjednik suda

KANTONALNI SUD U TUZLI

Broj: 003-O-Su-19-000 391

Tuzla, 03. juni 2019. godine



Indira Hadžimehmedović,
predsjednica suda